



華朝志卷四

死事列傳

鐵鉉傳

浙澣

許相



鐵鉉河南鄧州和豐里人也洪武間由國子生為
都督府斷事奏對詳明高廟嘉之賜字鼎石授
禮科給事中是時朝政威神羣臣奔走奉職救過
不贍鉉獨以材能稱上任使數被命讞疑獄有
聲有訴潛邸人違法狀者下法司鞠治數日未成

獄上怒屬鉉鞠之片時獄成由是益愛重之未
幾擢山東布政司左叅政建文己卯曹國公李景
隆將諸道兵馬數十萬禦北師駐德州鉉軍興不
乏既而景隆軍敗南奔鉉與叅贊高巍相遇于臨
邑協盟定計迎景隆收潰卒保濟南北師至圍城
數匝百計亟攻屹不可破鉉每出不意襲擊敵師
攻圍既久城輒壞輒修鉉外張藍布蜃灰界紋如
甃石狀而內襯之蓆并力潛築北師遙望驚以為
神數日修完又復出戰一日鉉忽開門令士皆解

甲出降潛邸信之整駕將入鉉豫于城門置鐵版
如錘伺潛邸方入錘下馬首幾中而脫鉉知計不
就帥衆背城奮擊北師大亂解圍奔還北平德州
及諸郡縣皆復兩軍攻守凡三月餘而罷鉉宴諸
將佐于天心水面亭犒問辛苦述賦賡歌激發忠
義有張睢陽顏平原之風焉事聞下詔褒嘉遣翰
林陳檢討賜鉉金幣吏部魯主事頒誥命封鉉三
代如其官鉉入謝賜宴陞山東左布政使尋進兵
部尚書監大將軍歷城侯盛庸總天下兵壬午四

月北師至宿州鉉監督諸將奪擊大破之于小河
斬驍將王真中原震動是時潛邸幾欲棄師北還
朱能力陳楚漢成敗以諫于是決計南向再戰大
勝長驅渡江鉉猶擁兵淮南規圖興復 文皇既
克京城即位計擒鉉至背立庭中正言不屈令其
一顧堅不可得命截其耳鼻終不肯顧乃寸割之
比死罵喃、不絕聲時十月十七日也年三十七
父仲名母薛氏皆年餘八十竝海南安置子福安
年十二發河池編伍福昌七歲發鞍轡局習匠尋

皆戮死家屬發教坊司鉉二人終不受辱久之鉉
同官以聞 文皇曰渠竟不屈耶乃赦出之皆適
士人云鉉以非常之才匡難殉國遭天命已改志
不克就然剛毅果敢之氣耿、激烈不可屈撓自
其蚤歲受知 高廟已負託孤寄命不奪之節乃
卒以烈誠竒畫震耀今古 文皇每對羣臣特稱
其忠焉

姚善傳

姚善湖廣安陸人字克一初曰李善復後姓為姚

善云善志行淳寔學識高遠為諸生時題其讀書
所曰待旦唐之淳為之銘善嗜學工詩與之淳相
唱和洪武中由鄉貢為祁門丞同知廬州重慶所
至以能稱洪武末知蘇州府蘓俗承元汰侈豪右
居服踰制高皇帝峻法整齊之誅夷狼籍囂者
或更持短長賊譎鋒起特稱難治善洞曉政體諳
悉人情弛張寬密各協事宜教延郡賢詢求治道
商畧民生休戚俗尚淳漓調劑消息由是吏民敦
尚禮教蘓治更為列郡最隱者王賓獨居陋巷善

躬往候舍車徒步叩門賓問為誰曰姚善乃開門
延語及賓報謁望門再拜而退善趨迎之終辭不
入又候韓奕避入太湖善歎曰韓先生所謂名
可得聞人不可得見者耶善又禮重俞貞本錢芹
芹自守甚高善初願見不可得嘗以米饋貞本吏
悞致芹旋覺其誤皇恐告貞本貞本曰錢先生與
人不苟合尤不苟取受米不辭者知太守賢也善
喜訝欲往見使人通意芹對使者曰芹誠願見然
芹民也禮不可往有如明公弘下士之風請候月

朔胥會于學宮善如期迎芹坐上坐延質經義芹
曰公方有公事請姑舍是善竦然起敬卒問之芹
出一簡授善不答片語而去歸視之守禦制勝之
策也建文己卯北師日南善畫策勤王資芹簡為
多壬午六月文皇克京師即位蘓子澄走蘓約
善航海善曰在公則可善守土之臣與城存亡耳
善先奉詔兼督蘓松嘉鎮常五郡軍馬未戰麾下
許千戶等縛善赴京磔于市是年七月十日也時
年四十三長子節發戍賀縣幼子繼兒蘓州隨母

給配保兒項兒送工部習匠正德中巡撫御史秦
金祀之鄉賢祠

王良傳

王良字天性河南祥符人建文中為刑部左侍郎
以問定燕人罪輕左遷浙江按察使至杭謁岳飛
墓曰媿武穆者非夫也壬午六月北師渡江良慟
哭誓死文皇即位命使召良良執使者繫獄詰
旦縛出將戮以狗道遇徒眾鼓譟奪使者去良還
坐堂上收司印九篋入嗟嘆躊躇久之妻問故良

曰我分應死顧思所以處汝未決耳妻曰我不難
處君男子乃為婦人謀乎遂命妾饋良食抱子歎
歎如廁投于池以死良久往視子匍匐池旁頃之尸
浮水上良殯殮畢遣家人攜幼子往託某僉事或
曰托其鄉人之商于杭者遂閉其眷屬烈薪縱火
抱印投烈焰中時六月二十一日也事聞 文皇
曰死自其分擅毀制印特其罪耳詔徙其族于邊
厥後風雨晦冥英爽時見後官不復敢寓其宅台
人陳燧私識其事談之輒流涕沾襟云正德中按

察使梁材祠祀良于公署東偏提學副使劉瑞為
之記

王彬傳附崇剛

王彬字文質山東兗州東平人洪武中進士起家
為監察御史巡按江淮北師日南彬與指揮崇剛
守揚州揚州衛指揮王禮謀以城降訶知之執禮
及其黨繫獄堅城自守七日不解甲揚有力人能
舉千斤彬恒以自隨北將楊玉招諭揚州飛羽書
入城有縛王御史降者官三品禮黨憚力人莫敢

覲彬已乃厚賂力人母誘其子出彬適解甲浴于
戶徐政等縛彬并剛縋城送北師遂與禮弟宗干
戶張勝舍人吳麟等數十人破獄出禮等與俱降
北將欲降彬、不屈死剛、死之府衛官皆降江
都知縣張本尚為守禦計其母立曰此天命也違
天不祥于是本、率江都父老詣北師降本東阿
人洪武中以國子生知江都本既降即以本知揚
州府後歷官兵部尚書太子賓客

陳彥回傳

陳彥回字士淵福建莆田人父立誠洪武初舉秀
才知保德州徙應州降知博羅縣罷歸十六年復
官歸安縣丞以非辜陷重辟家屬俱被逮謫戍彥
回戍雲南弟彥回戍遼東大父及母涂子需善從
彥回往皆道死惟彥回與祖母郭氏行至蜀遇赦
不及監送者哀而釋之貧不能歸聞邑人黃積良
知合州定遠縣往依之為積良奴易姓名曰黃禮
既而積良亦罪廢彥回轉依鄉人南充丞于仲和
闡中教諭嚴德政知其才以明經薦為保寧府學

訓導九載入朝承顧問陞平江縣知縣建文初給
事楊惟中等交薦其文學廉幹陞徽州知府到官
數月政教一新以祖母喪服承重徽民詣闕請奪
情終任未報己卯春彥回至闕疏其改姓歷官情
重乞正名籍乃罷為民尋命復官留郡治事復疏
乞終制不允詔復姓名裏事供職并釋彥回免戍
彥回乃暫解職葬祖母于郡之北山每旦哀奠而
後視事士民名其山曰太白山北師南來彥回奉命
募義勇至京還郡未幾北師渡江彥回復率義勇

赴援 文皇即位擒械彥回至京不屈棄市壬午
六月十五日也時年四十七妻子給配是時浙江
亦有同知揭榜募兵兵復指斥無忌尋亦逮捕磔
于市失其姓名

鄭華傳

鄭華字思孝浙江臨海人洪武丁丑進士授行人
建文中謫東平州判官北師日迫謂其妻蕭氏曰
吾身不復惜奈親老汝少何妻泣對曰君能為國
計吾獨不能為君計耶華乃称疾尋醫以家托其友

無錫丞趙次進亟馳還東平時北將朱龍攻陷東
阿分兵取東平東平守將俱亡去華曰守土之臣
義不苟生獨率吏民死守憂勞病甚水漿不入口
者五日力疾戰死壬午正月某日也時年甫三十
台郡祀華于八忠祠

顏伯瑋傳

附唐子清
黃謙

顏伯瑋名瓌以字行江西廬陵人唐魯公真卿之
後武洪末以賢良徵授知徐州沛縣建文庚辰冬
北師乘勝而南所過郡縣望風迎附伯瑋獨設備

誓以死守時李景隆駐師德州伯瑋率淮北郡縣
民夫運給軍餉措畫有方未嘗缺乏辛巳六月北
師直擣濟寧遊兵過沛上沛人竄匿伯瑋招徠之
九月會設沛豐軍民指揮司集民兵五千人築堡
備禦躬自教閱時加激厲皆為精兵壬午正月北
師駐沙河二十二日攻沛伯瑋遣縣丞胡先詣徐
州告急度不能支預遣其子有為歸告其父曰汝
還真人伯瑋弗復得為子矣既而指揮王顯迎降
夜二鼓北師入東門伯瑋冠帶升堂南向拜哭之

曰臣無以報國遂自經死時年五十有為不忍去
復還伯瑋已死亦自刎以從北師擒主簿唐子清
典史黃謙至皆不屈死之縣丞胡先葬伯瑋父子
于沛南閔楊士奇過沛以詩悼之詩云平生金石
容子亦隨干載河山遺縣在一門忠孝史官知故
鄉住近文丞相先德傳從魯太師欲酌丘墳何處
是離、芳
草淚空垂

鄭恕傳

鄭恕字本忠浙江仙居人治尚書好古博雅工詩
能書家貧授徒自給攻苦食淡一室蕭然魚釜塵

甌高風狷守凜如也明州守聞其賢而貧署為昌
國縣學訓導陞知蕭縣北師至力拒被擒時年五
十六二女當配亦死之子濂湜姪溫汲皆從坐壬
午八月七日也按壬午正月北師克沛四月戰靈
壁五月至泗州六月渡江蕭沛密迹恕死當于此
時此云八月者聞之台人恕嘗有平幽燕疏歸起
義兵時無應者遂往就戮蓋事定加罪也台祀恕
于八忠祠仙居專祠恕其二女又別祠云

陳性善傳

陳性善初名復以字行浙江山陰人洪武乙丑進士臚唱過御前高帝見其容止凝重屬目久之謂侍臣曰向唱名陳性善者君子也授行人司副已而入翰林為檢討初誠意伯劉基薨上遣御史李鐸往取其遺書基子璉出書石室中從鐸詣闕上之命簡工書者數人入便殿繙錄性善與馬天威嚴重進見者無不人人惴恐或戰汗不成一字性善動止安雅書法妍正高廟嘉悅時威譴巨測性善留中竟日家人以為必死既出乃大驚

久之起拜禮部左侍郎薦達流人薛正言等雲南布政使韓宜可方隸謫籍亦以性善言起為副都御史帝在東宮已熟性善既即位一日退朝獨留性善賜之坐問以治天下之要使書以進性善益感知遇尽所欲言朝廷悉從之然施行未竟輒為權奸所尼性善請對曰陛下不以臣愚猥承顧問臣既僭塵聖聽許臣必行今而詔書云然所謂為法自戾何以信天下帝為之動容未幾北師南下帝命性善監李景隆軍大戰白溝河敗績

性善與大理丞彭與明欽天監副劉伯完指揮王
貴皆被執旋縱遣之性善服朝躍馬入于河以死
文皇克京師即位詔追戮之徙其家屬于邊洪熙
初邑人吳驥傳其事

陳思賢傳

陳思賢廣東茂名人洪武末為福建漳州府學教
授教人必以忠孝禮義先躬行而後文辭多所造
就文皇即位頒詔至漳思賢率其徒吳性原陳
應宗林珏鄒君默曾廷瑞呂賢即明倫堂為舊君

位哭臨如儀郡人執思賢入京死之六生皆以身
殉嘉靖中提學副使邵銳立祠學宮祀思賢侑以
六生云

王省傳

王省字子職江西吉水人祖德明元沔陽州學正
德明生君賢君賢生省洪武五年省舉鄉試明年
詔免會試令吏部次第擢用省乞歸養復以文學
徵高廟御試稱旨例當殊擢省以才薄力弱親
老乞就儒官便養授浮梁教諭尋丁父憂起改睢

寧又改濟陽北師壓境省為遊騎所執從容引譬
辭義慷慨乃釋之歸召諸生集明倫堂諭之曰若
等知此堂何名明倫何為君臣之義乃大哭諸生
亦哭省頭觸堂柱而死後有司立祠學宮祀之子
禎為夔府通判亦死于義初省女嫁邑人周岐鳳
從官即墨簿北師起女泣曰吾父必不生矣請于
夫遣人往詢凡三反竟得其遺骸以歸

黃彥清傳

黃彥清不知何許人亦不知仕何官相傳建文末

有黃清者巡撫某地 文皇即位頒詔之不受命
謀起兵兵復力寡而死疑即彥清也或云黃當作
王先嘗為國子博士充史官

蔡運傳

蔡運江西南康人洪武中以貢士至四川布政司
叅政署布政使事尋罷歸建文末起知賓州有惠
政以忠死于官

石撰傳

石撰山西平定州人洪武中為寧府右長史靖難

師至所在郡縣皆下撰在大寧獨為守備計及北師攻拔大寧撰終不屈支解之

張曷傳

張曷山西澤州人洪武中以人材舉建文中累官至工部右侍郎會諸藩不靖齊泰黃子澄等建議藩國所在更置素有重望能彈壓者為守臣乃出曷為北平左布政使曷至官日求王府細事并誅誘其官屬察潛邸必起兵遂與謝貴謀以北平七衛及屯田軍士布列九門防禦之曷瞰動靜飛章

上聞先是曷以司吏李友直幹敏引與共謀友直密告潛邸并竊其章以敵適朝遣中貴逮護衛官校潛邸盡收所逮召曷貴入令械送曷謂潛邸勢窘當不妄防守遂疏二人入燕山西護衛副千戶譚淵執之于端禮門曷不屈死壬午六月文皇即位詔族其家逮曷戚屬程亨諸姓皆生焚之疏屬并同里人分戍邊徼文皇屢夢曷被髮為厲命斲曷棺焚其屍面如生洪熙初詔曷戚屬戍邊者家籍一人餘縱之歸正德中知州馬汝驥始立

祠祀曷云曷負重望寔無能為齊黃昧于知人哉
而當時亦何重望歸之嗟夫殆天數人事奉會然
耶

謝貴傳

謝貴不知何許人洪武末為錦衣衛指揮僉事陞
河南都指揮僉事齊泰黃子澄建削奪諸王之策
潛邸憤恚称病奏謀以脩虜為名薦貴為北平都
指揮使張曷為左政俾誅誘王府官屬覘察王府
動靜己卯三月朝廷命宋忠帥師至燕約貴先發

發六月貴以在城七衛并屯田軍士布列城中填
溢街巷迫圍王城又以木柵斷端禮等四門已而
軍士擐甲執兵登俾飛矢入于王城四面鼓噪震
動七月潛邸乃命指揮張玉朱能等帥護衛勇士
八百人為之備能請先擒貴曷潛邸曰彼防守既
嚴猝亦難擒須以計致之今奸臣遺中人來逮護
衛官屬宜悉依所坐收之令中人召貴曷面付所
逮貴曷必來、則縛之一夫力耳乃匿壯士端禮
門內遣人召貴曷至衛從甚眾門者呵止之惟貴

曷得入至端禮門壯士出擒之衛從者聞二人被擒皆散走玉等率勇士捕之是夜攻九門黎明已克其八惟西直門未下指揮唐雲單騎往諭守者皆散乃盡克九門潛邸親聞貴曷知其謀出齊黃于是上書入清君側之惡而兵端不可解矣貴等即日誅死嗟夫貴直行伍匹夫耳觀其舉動與兒童之見何異而張曷任其能曷亦妄一男子也特其一死報君得殿傳末云

馬宣傳

馬宣建文中以都指揮守薊州己卯七月北師起宣謀起兵迎拒已而張玉朱能來戰宣與鎮撫曾濬等乘城拒守潛邸使人反復諭之不下玉擁衆急攻宣率兵出戰玉遣精銳衝入其陣執殺之事聞帝褒恤焉時遵化守將亦被執不降見殺

朱鑑傳

朱鑑建文中以都指揮提兵守大寧己卯十月北師至大寧鑑督衆堅守北師攻之自辰至午城陷鑑死之事聞帝加厚恤相傳馬宣與鑑之死皆

嫚罵不絕口云

曾濬傳

曾濬薊州衛鎮撫。君紀元年十二月濬起兵還朝。不克死之。然其死在馬宣前後，皆不可攷。但其志尤忠烈，欲有所為，與沒于行陣者不同，宜特書之云。

彭聚傳

附孫泰 俞瑱

宋忠

彭聚以都指揮與同官孫泰副宋忠守懷來為防禦。計潛邸爰作建文初元三月調沿邊各衛馬步

官軍三萬屯開平。燕府護衛壯精官軍悉選隸忠麾下。護衛胡騎指揮閔童等悉召入京。調北平永清左衛官軍于彰德，永清右衛官軍于順德，以都督徐凱練兵臨清，都督耿璫練兵山海關。諸將防于外，張昺謝貴防于內。約俟時俱發，以傾潛邸。貴與張昺謀泄，潛邸殺之。北師遂起，忠守懷來。大將俞瑱守居庸，閔相為聲援。已邠北將指揮徐安等敗瑱，拔其城。瑱走，依忠而居庸。為北將所守，潛邸語諸將曰：宋忠擁兵懷來，居庸有必爭之勢，因其

未至可先擊之諸將皆曰敵衆我寡難與爭鋒擊之未便宜固守以待其至曰非尔等所知當以智勝難以力論彼衆新集其心不一宋忠輕躁寡謀狠愎自用乘其未定擊之必破癸未潛邸親率馬雲徐祥等馬步精銳八千卷甲倍道而進甲申至懷來先獲諜者言宋忠誑其將士云爾等家在北平皆為燕王所殺委屍滿路將士或信或否潛邸乃命其家人張舊旗幟為前鋒衆遂識旗幟又識其父兄子弟相呼輒應喜曰我家固無恙幾為宋

都督所誤皆倒戈來歸宋忠餘衆倉皇陣未成列北師渡河鼓譟直衝其陣忠大敗奔入城匿于廁搜獲斬之俞瑱亦見執聚泰力戰死之為北師所俘獲者不可勝計獨都指揮莊德一軍遁去其後北師反間再行名將卜萬吳高皆見疑廢黜而耿炳文李景隆相繼敗衄雖有大將陳暉平安歷城侯盛庸皆不能軍而亡勢成矣

莊德傳

莊德建文中為都指揮辛巳三月歷城侯盛庸與

北師戰于夾河德殺其大將譚淵已而北師以勁騎乘暮掩擊德遂與楚智及皂旗張等力戰而死

俞通淵傳

俞通淵直隸巢縣人別見開國功臣錄中建文己卯七月命艾端起故越雋侯俞通淵授豹韜衛指揮使八月領軍北征潛邸明年四月戰于白溝河陣歿帝哀悼嘉卹賜葬南門外聚寶山號國墓以神策衛老軍劉海守之而命其子靖襲豹韜衛指揮使尋卒幼子端建文末命錦衣衛復給全俸

亦卒遂絕

宋瑄傳

宋瑄都督晟第二子也建文中為府軍右衛指揮使與北師戰于靈璧歿于陣永樂初兵部請于朝命晟第六子世其官

廖鏞傳

廖鏞直隸巢縣人祖永忠從高廟平中原克西蜀有功父權襲封德慶侯鏞以勲臣子任散騎舍人任用建文間永樂元年四月十日鎮衣衛鎮撫

司奏送鑄刑部就戮弟銘鉞仲父淮安衛指揮僉
事昇俱謫戍毋湯氏東甌王和長女也并銘女送
浣衣局相傳 文皇清宮三日即位召方孝孺草
詔孝孺不屈聞廖都督西子受學孝孺復令召之
孝孺終不屈戮死廖西子拾其遺骸葬聚寶山甫
畢而廖氏亦見收矣西子豈即鑄之兄弟歟

瞿能傳

瞿能不知何許人洪武中為四川都指揮使驍勇
有名嘗從涼國公擊西番有功北師起從李景隆

為裨將^{二年}庚申戰白溝河敗績諸將皆狼狽走
能父子獨力戰死之精兵萬餘人皆死

華朝志卷五

死志列傳

黃鉞傳

浙澣

許相卿撰

黃鉞字叔揚直隸常熟人少穎嗜學而家無書日
遊書肆中借觀之或竟日不歸國初法峻士不樂
仕人文遁逸詔下多方求賢甚急鉞父見鉞好學
甚恐不免數懲之弗為變乃令督耕葛澤陂田舍
間鉞託市鹽酪一二日入城借書親知間沿道披

閱至波輒盡每以為恨隱者楊滌避雨泊舟越舍
旁見鉞倚簷讀書就視之曰豎子好學如此哉日讀
幾何對曰苦無書讀耳過日不忘也滌曰我有書
藏洋海店架插不下萬卷豎子能從吾遊乎鉞喜
從滌入舟至其舍乃令其子福與鉞同業三年盡
其書縣聞之辟福賢良滌怨鉞曰吾遭亂世家破
族散携兒耕讀遠郊以全餘生以子好學舉書供
業一何不善晦并累吾兒耶鉞徐曰第毋恐乃說
尹罷福獨遣鉞試入太學選授宜章典史建文己

卯舉湖廣鄉試明年庚辰第進士授刑科給事中
陞戶科左改禮科居職封駁無所顧避辛己以父
喪歸其所厚翰林侍讀方孝孺予之屏左右語曰
北方不靖蘓常鎮京師之左輔君吳人朝廷近臣
此別何以教我鉞曰三郡鎮江為要守非其人是
撤垣以納盜也頃見童俊奏事上前視遠而言遊
此狡獪不可測蘓州守姚善忠義激烈有國士風
必能獨當一面然國家大勢不在江南待戎馬至
此亦晚矣孝孺乃因鉞附書善期戮力王室善得

書與鉞相對慟哭誓必死國鉞守殯葛澤波有御史按部常熟問黃給事中安在邑中無知其家者一老人居與鉞鄰引御史舟抵其舍鉞從幕中對語竟日家人欲割雞具饌鉞驚曰孰有執親之喪而殺雞禮客者耶卒以菜粥對食而別壬午春北師日促姚善受詔摠率蘓松常鎮嘉五郡兵馬勤王以書招鉞、期襄事赴命既而童俊果以鎮江降文皇繼統詔暴姚善罪狀收之鉞聞慟哭絕食求死家人救免或傳善已歸命赦罪鉞復瞠目

曰吾知善決無二心且少俟之善事定吾下報希直未晚也復稍食是年七月十日善死報至鉞起登琴川橋西向哭而祠之曰吾與君同受國恩同許身國難君與希直同死義矣吾忍背義獨生乎祠畢給家人歸祭具從容整衣冠奮身入水死時收善黨急訛言併戮鉞家族媿悉驚伏鉞故同業生楊福具衣棺晝夜泣橋側徧求其屍數日屍忽自出立水中容體如生福慟哭抱持易衣冠成禮葬之

高魏傳

高魏字不危山西遼州人魏事母蕭至孝母老得
痼疾奉湯藥不懈母止廬墓飭粥水飲三年洪武
十五年應貢入太學十七年有司舉孝行詔旌其
門尋授前軍都督府試左斷事十八年魏上書乞
懇河南山東北平兵後荒田歲可省漕數十萬石
又言抑末務慎選舉惜名器數事高廟深嘉納
之後斷事忤旨當死議賢謫戍閩索嶺許以姪代
建文初元魏上疏陳情乞歸田里許之時詔求賢

甚急遵守王欽碑魏應詔上疏論時政其一曰弱
藩王之權借漢為喻云高帝懲秦孤立而止大封
同姓王三庶孽分天下半其慮遠矣然卒遺後世
以不治之痼疾賈誼指股脛腰之喻明且切矣時
不果用而斗粟尺布之謠卒為孝文盛德之累斯
往事之可鑒者也景帝厚德已慚乃考又輔之以
刻深之晁錯輕削諸藩啓釁徼禍使非文帝擇將
貽謀民心戴漢則社稷危矣我高帝皇同符漢
高英武過之上法三代之公下洗孤秦之陋封建

諸王必先形勢比之古制雖過然揣聖意凡以護
中國屏四夷為聖子神孫萬年慮也夫何地大
兵強易以生亂故今諸藩驕逸違制不削則廢法
削之則傷恩有難處者賈生曰欲天下之治安莫
若衆建諸侯而少其力力少則易使以義國小則
無邪心真裁制諸侯之良策也臣愚謂今蓋師其
意勿施晁錯削奪之策效主父偃推恩之令西北
諸王子弟分封于東南東南諸王子弟分封于西
北其餘類比而畢封之小其地大其域以分其力

如此藩王之權不削自弱矣臣又願陛下益隆親
之禮歲時伏臘使問不絕賢如河間東平者下
詔褒賞驕逸不法如淮南濟北者始犯則容再犯
則赦三犯而不改則告廟削地而廢處之寧有不
順服者哉夫天下猶人一身皇上天君一心也諸
藩則五臟耳目鼻口手足也五臟甘酸嗜欲不同
手足勞逸亦異至如目好色耳好音紛綸不齊苟
天君下後百體之好則何以具衆理而宰萬物亦
在制其撓吾心者而已醫家者流謂智者能調五

臟五臟既和不惟無腹心之疾而疥癬亦無自生矣噫五臟和而一身安一家和而天下安里諺曰家不和四鄰欺臣愚亦謂國不和四夷窺其理一也蓋自古帝王之治莫不以修身齊家為先是以堯典自親睦以逮平章文王刑寡妻至兄弟而御家邦孔子言修齊措之治平孟子言親仁民而及愛物此古今聖王盛德大業之軌範也惟皇上察焉書奏天子竒其才未幾北師起朝廷命將出師詔魏叅贊曹國公李景隆軍魏上疏言臣聞周公

東征待之三年而後用鉞者欲管蔡武庚自悔而改行耳今親藩不靖發兵討之臣竊惟陛下好生之心豈忍無罪之赤子肝腦塗地乎臣願使燕拔露肝膽陳大義原天命感以親之誼令其休兵歸藩代朝廷數十萬之師帝許而遣之魏自稱國朝處士高巍再拜上書燕國大王殿下魏聞世之所謂大丈夫者蓋以其為國家排難解紛上足以安宗社下足以安黎庶而無一毫徼利干譽之心焉爾巍樗朽之材遨遊山野經史自娛內有飽煖

之樂外無攘奪之虞沐浴皇朝之恩厚且深矣
魏雖無丈夫之才頗有丈夫之志慕魯仲連之為
人喜與人排難解紛名世而不朽也頃者不幸我
太祖高皇帝上賓聖天子遵遺制嗣大寶布維新
之政下養老之詔天下莫不感悅以為上有聖天
子外有骨肉藩翰二帝三王之治可待也忽聞大
王與朝廷有隙張皇三軍抗禦六師意將何出今
在朝諸臣文者智籌武者勇奮執言仗義以順討
逆殆無不勝之理魏不忍兵連禍稔挺身開說以

為逞纖芥之憤忿而覆百萬之生靈豈仁智之為
哉魏有一策解隙以和使帝者復帝王者復王君
臣之義大明骨肉之恩愈厚乃天下萬世之幸也
魏所以置死度外來見大王者蓋夙許太祖殞
身結草之報豈有他求哉且天下神器也不可以
知力求不可以知力求又可以知力守乎太祖
親提三尺奄有四海夫豈得之知力哉應乎天而
順乎人也以大王之賢知躬承聖訓不為不熟夫
何以一朝之忿化親為仇其為先帝之累何如哉

昔周公遭流言避東土以俟成王之悟大王誠解
護衛甲兵釋骨肉猜疑之隙塞讒邪離間之口大
王寧不比德于周公哉慮不及此而移檄稱兵侵
襲彊宇魏恐奸臣乘間窺竊神器大王獲罪先帝
尚何說之辭哉今大王據北平取密雲下永平襲
雄縣掩真定擒將虜士易若建瓴雖孫吳何以加
之但自兵興及今數月尚不能出區區蕞爾一隅
之地其用兵之計又可知矣且大王所將數十萬
衆者何人也大王與天子義則君臣親則骨肉尚

生離間之疑况數十萬異姓之衆可保其終身困
迫而死于殿下乎魏每念大王帝室最近之親一
旦如此未嘗不灑泣流涕也大王若以魏言為質
謝罪休兵朝廷必宥大王永享爵土如終迷不復
恃小勝忘大義以寡敵衆為僥倖不可成之悖事
魏誠不知其可也况大喪未終毒興師旅與泰伯
夷齊求仁讓國之義不大徑庭乎雖大王有清夷
朝廷之心天下無篡奪嫡統之議幸而事成雖中
大王之計萬世公論以大王為何如不幸蹉跌于

斯時也追復懇款之愚其可得乎願大王再思而
審處焉書達不報魏又復上書假周公引詩書反
覆數千言末云大王論親最長論行最賢我朝之
周公也當流言之謗亦如周公有碩膚之美無驕
悖之形內輔朝廷外屏夷狄則周公不得專美矣
惟我高皇純德同文王高后慈惠同后妃今
大王才美同周公輔今天子守成同成康我朝基
業同周室豈不盛哉魏白髮書生生死不惧久蒙
太祖教養無所補報故披露肝膽力陳大義如果

賜死獲見太祖在天之靈魏亦有以藉口矣書
上又不報已而壩上之戰大軍大敗魏從景隆收
潰卒退保德州尋復集眾百萬戰白溝河復大敗
魏于是南奔道遇督餉叅政鐵鉉于臨邑相與協
謀守濟南大著榮績會敵退與鉉燕天心水面亭
魏賦詩志喜迭相賡和且曰公既相機決勝加之
徐將軍盛統兵皆勇如猊虎高僉憲之糾謾宋叅
軍之謀畧張都統善于掠陣王太守善于儲給王
府校王肯藩善于論議何憂國難不旦夕乎乎魏

又後征晉陽鴈門等處聞 文皇克都城自經驛
舍下

劉璟傳

劉璟字仲璟浙江青田人誠意伯基仲子也 高
廟時拜閤門使以剛直聞改授谷府長史并勅璟
提調燕肅遼慶寧代六府事谷邸在宣府璟設險
足兵諸胡屏息北師初起璟詣闕敵策命赴李景
隆軍備歷艱險以疾歸 文皇登極召璟將用之
辭以疾乃命逮璟至京下獄自經死璟入見時猶

稱殿下且云殿下百世後逃不得一箇字蓋謂篡
云

徐耀祖傳

徐輝祖直隸鳳陽人中山王達之嫡長子也初名
允恭洪武二十一年十月襲封魏國公 高皇帝
賜名輝祖少侍 皇太子諸王學及從諸儒游習
經史大義又從詹希元學書工大字 建文君即
位特見信任時建武學于京師教將臣子弟輝祖
與駙馬都尉梅殷往來提督絃誦大興 高廟崩

諸王世子及郡王在京遺命三年喪畢遣還潛邸
將起兵世子及漢趙兩郡王留京師乃稱病篤以
王子請朝議以遺詔不許既而屢請益哀懇 帝
將許之輝祖不可明年潛邸疾愈入朝申前請中
山王女為潛邸妃 帝召輝祖及其弟都督增壽
議之輝祖執不可增壽獨以百口保之于是世子
二郡王得歸因北師起增壽伏誅潛邸以輝祖元
舅也召之輝祖終無推戴意日與齊泰黃子澄盧
振等協謀抗禦 文皇繼統輝祖例入奸黨論罪

以勲戚赦不誅勃歸私第鑄秩閒任尋收繫薨于
獄或云永樂五年八月輝祖子欽襲爵子孫恩教
視增壽子孫常差薄云

鄒朴傳

鄒朴字爾愚江西永豐人仕至秦府長史建文初
以儒官仕周府直言極諫沮其邪謀王不聽嚴刑
禁錮甚密王逆謀覺大臣以朴諫疏聞 上嘉其
忠義召至京具言始末特陞監察御史尋陞秦府
長史歸省聞鄒公瑾死憤激不食卒時人謂朴瑾

為永豐連璧云

東湖樵夫傳

東湖樵夫不知何許人亦不知其姓字建文壬午七月樵夫鬻薪臨海東湖上見里巷傳相語曰新天子即位詔至矣樵夫瞠目久之舍擔奮擲于水而死

劉政傳

劉政字仲理直隸長洲人父以禮洪武初薦授沛縣教諭政幼聰睿力學夙以忠義自許建文己卯

以春秋發解應天府時國家多難題試可以託六尺之孤考官方孝孺得其文驚嘆曰此它日臨大節而不可奪者吾當虛左以處之壬午六月聞孝孺死國事已去悲憤不食大呼躍投地絕脰而死

牛景先傳

牛景先建文中屢抗禦北師有功京師平景先變姓名出走死蕭寺中已而窮治奸黨二年冬逮景先妻妾及卓敬女至詔發教坊司

革朝志卷六

死遁列傳

彭與明傳

彭與明江西萬安人國初以貢入太學洪武二十五年授兵科給事中陞刑部浙江司員外郎建文己卯陞湖廣按察司僉事遷大理寺右寺丞北師起與禮部左侍郎陳性善欽天監副劉伯完指揮王貴等俱從李景隆軍中白溝河戰敗與明等皆

浙游

許相卿撰

被執尋悉縱遣之北師渡江與明遁去徧遊四方
志欲有為越數年微服來歸窮餒憔悴殆不可解
詢其故飲泣不言翌日竟去不復返不知所終

周縉傳

周縉字伯紳湖廣武昌人曾祖壽元翰林直學士
國初縉以貢入太學試事有廉謹名時戶部奏遣
太學諸生勘天下錢穀凡幾千輩歸報多失寔論
坐者十八九縉獨無所坐授北平永清縣典史居
官廉慎既而攝縣事境內多盜縉摺治有法一邑晏

然是歲旱蝗不為災無何潛邸師興一時守令相
率迎降永清地尤密邇縉極力拒守民多寡弱逃
散縉自度無可為佩印南奔欲有所為道聞繼母
喪還家營葬甫畢亟圖勤王戰艦戎器畧具而天
命有屬國事已去縉乃走匿編民間已而蹤跡漸
露有司見收縉自分必死慷慨就行械送闕下
文皇義其志下之獄謫戍興州居數年以其子代
還屏迹田園年八十而終吳文定公寬為縉傳有
曰以愧世之為丁公而倖免者嗟夫縉亦所謂不

可奪志者哉

石允常傳

石允常字恒德浙江寧海人洪武甲戌進士歷官河南按察司僉事廉介有聲人稱石清潭為僉事時嘗微行民間聞哭声甚悲允常廉知其女為閹宦逼奸而死受其訴聞于朝捕宦抵大辟羣宦銜之糾結巧誣左遷常州同知俄北師起允常棄官歸文皇登極追錄建文間廢毀周官官僚事逮至者五十餘人允常與焉眾悉洵惧服罪人止贖

朱五十石命于原官加一秩仍用之獨允常鍛鍊百端堅不服繫獄二年免死謫戍中屯衛躬操甲冑幾三十年年七十代還過西畿感愴病卒舟中遺文曰遇安集

葉希賢傳

葉希賢浙江松陽人國初舉賢良擢監察御史建文壬午六月之變家人驚潰相失意希賢必死發喪以衣冠歸葬希賢寔出山髡髮隱姓名為僧號雪庵溯江而西上抵重慶之善慶里里有隱者杜

景賢一見希賢知其非常人也與之遊往來白龍
諸山山旁有松柏灘、水清駛蘿篁森鬱希賢意
欲留居之景賢素豪有力乃為之寺希賢率其徒
數人居之朝夕誦經呪諦聽之易乾卦也景賢婉
諷之曰和尚祖釋而誦儒將儒行乎不可可亟誦
佛希賢悟遂轉誦觀音經因名觀音寺焉希賢又
好誦楚辭時、放舟中流朗誦一葉畢即投一葉
于水誦已輒哭、已又誦終卷乃已人莫測其意
希賢性嗜酒日注一壺客至即飲客不至雖樵夫

牧豎亦拉入與飲、半醲呼兒童曰我歌爾和歌
竟瞑焉而寐希賢形頽而頽指柔而白落筆成章
星流電掣紺雲飛逆不事工密而意氣渙發能感
愴人見者驚異或曰希賢當建文壬午為翰林學
士滅迹以死、之日其徒問曰師即死宜銘師故
何許人但答曰松陽而已遺詩若干篇時又有河
西傭馮翊翁韜光匿采意亦雪庵之儔然竟莫可
踪跡云

補錫者傳

補鍋者不知何許人往來隆安里間帕首挂短衲
業補鍋而食其力垂老不漏一字偶值三教詩老
酌酒聯句補禍者業暇立于旁怪其語澀而艱輒
然者再請老怒曰汝能詩即續吾詩指韻而應諸
老驚起延之上坐請賦席上獅頭柑不可強之而
後可過此若病風然卒晦以死人言其與雪菴故
俺友死死不相問訊云

程濟傳

程濟陝西朝邑人有方術洪武末以明經舉為四

川岳池縣學教諭岳池去朝邑數千里濟寢食在
朝邑而日治岳池學事不廢建文間上言某年某
月西北兵起以為非所宜言械繫之京入問故將
斬之濟叩頭曰陛下幸因臣期而無兵臣死未晚
也乃繫濟詔獄已而北師起乃出濟命為軍師護
諸將北伐諸將與北師先鋒戰于徐州大捷已而
李景隆師敗北師乘勝席卷遂至江上濟逃去不
知所終初徐州之捷碑載戰伏次第及諸將姓名
濟忽夜往祭碑莫測其故及潛邸過徐望碑問故

大怒顧左右趣椎碑一再擊邊曰止止為我錄碑
來于是按碑誅諸將無得脫者濟名正用擊處得
免濟曩者之祭蓋禳之也

高賢寧傳

高賢寧山東濟陽人建文中為太學生北師圍濟
南不下潛邸射書城中諭諸守者亟降賢寧作周
公論成王論射城外請亟罷兵後賢寧被執潛邸
識之曰此作論季才耶好人也留官之固辭其友
紀綱勸受命賢寧曰君學校棄才吾廩食太學義

固不可綱為之言全其志而遣之年九十七卒綱
故諸生除名故謂棄才云

王徐傳

王徐字叔豐紳之子績學能文有大父風受業方
孝孺孝孺甚器重之許妻以女孝孺之及于難也
徐周旋其間又與鄭珣至聚寶門外求孝孺遺骸
歸葬不得卒坐逮繫文皇念其祖禱死國特宥
免方欲向用而徐以疾辭還金華結屋讀書青巖
之下將終身為復購孝孺遺文為疾城集以傳人

咸義之徐性主孝初紳痛念父歿每食必斥兼味
徐一遵遺志子孫相承閱數十年不變事母丁如
事其父送終盡禮三年酒肉未嘗入口學問該博
從游者日衆郡邑交重之禮為鄉飲賓至以分敵
先宣廟徐踈髯偉貌出必儼然古冠服人爭觀之
曰此王先生也所著有青巖稿聖廟文纂金華賢
達傳續文章正宗卒年五十九門人私謚曰孝莊
先生

何申

何申不知何許人為中書舍人建文末奉使四川
至峽口聞都城事定悲憤慟哭嘔血數升不數日
疽發背死

郭良梁中節

郭良不知何許人建文末與梁中節俱棄官為道
士去

梁良用

梁良用浙江定海人建文中父子兄弟八人同仕
于朝壬午之變相率去為舟工後皆死于水

梁田玉

梁田玉浙江定海人洪武末仕至郎中建文末與葉御史俱髡髮逃禪晦跡終其身

梁良田

梁良玉建文中中書舍人田玉族人也靖難後逃入廣之南海鬻書為業以死

宋和郭節何洲

宋和不知何許人建文中為中書舍人與郭節及海州人何洲皆棄官變姓名為筮死異域

卷終

革朝志卷七

死終列傳

王度傳

浙澣

許相鄉

撰

王度字子中廣東歸善人以博學脩辭為學士師洪武末由明經儒士薦起家拜山東道監察御史繩糾務持大體不避權要疏十餘上多見採納高皇帝崩建文帝立諸藩不靖兵部尚書齊泰等會議軍士度與僉謀庚辰度監會試得知名士

為多曹國公李景隆北伐敗績退保濟南以歷城
侯盛庸代度密陳便宜皆制勝策遂有東昌之捷
景隆徵還赦不誅用事者忌庸等功行讒間度等
與謀者皆見疎卒己亥六月濟寧告急師徒屢敗
將士皆選奕避敵度奏請募兵壬午春小河之捷
命度勞師徐州而還夏五月鳳陽不守方孝孺等
畫策與度誓死社稷七月京師事定坐黨謫戍賀
縣千戶所詔不遜族誅時年四十七歲

張純傳

張純字昭季陝西富平人父月川文行知名純少
勤學勵行由明經舉為東宮侍書才識通敏懿
文皇太子器重之洪武中陞通政司左叅議尋出
為雲南布政司右叅政進左布政使時六詔初附
庶務苟簡凡土地貢賦濫令條格祀神壇祠公署
廨宇與夫上下典儀公用程度悉純裁定民夷擾
悅雲南流寓多中土衣冠純與董倫王景華勞來
安集凡在境內外者無問識不識存慰懇到遷謫
之士至者如歸秩滿入覲上賜璽書勞之曰曩

者討平西南夷命官撫守爾純寔先挺任今五年
矣言出則諸夷聽服令布則四海懽欣皆由誠信
相孚克共乃職今年來朝不待考而朕知其功出
乎天下十二牧之首故嘉汝績復命仍治黔南汝
往欽哉 建文帝立徵拜吏部尚書滇人戀慕如
失父母屬時更化旁求英賢日集待用純識鑒精
絕量才授任各適其宜由是士類相慶後造湍朝
純之力也會修 太祖寔錄被旨試諸翰林之任
編纂者第高下授官時楊士奇亦在試列純讀其

策曰明達時務有用才也以為第一奏授王府審
理副士奇由是知名後果大用壬午六月北師入
京討奸黨純與焉 文皇即位召純與王純諭曰
卿二人事 皇考文習知典故今皆老矣其解職
務月給尚書半俸居京師視時政有戾舊制者直
言無隱庶稱厚望老成之意純出自經于部之後
堂所著有鷄菴集

樓璉傳

樓璉字士連浙江金華人業宋濂之門洪武中

以儒士召主宣寧仁壽二縣簿建文初下詔求賢
璉以文學舉入翰林侍經筵官至侍讀 文皇即位
命方孝孺草詔孝孺不屈戮死復改命璉、入
見孝孺極刑惶惧受命歸獨憤歎其妻問之曰得
無傷方先生耶璉愧曰我受刑尚可正恐累汝輩
耳遂巡間一夕自縊死

右死國諸臣彰明較著者大書顯列之矣若夫
抗禦執縛委身不貳莫攷其終者尤非一人滄
州之戰都督徐凱程暹都指揮俞琪趙澣胡原

李英張傑德州之掠千戶蕪璫東昌之襲都指
揮唐禮濬沱河之戰都指揮鄧戩陳鵬真定之
圍都指揮朱榮定州之戰都指揮花英鄭琦王
恭指揮詹忠渡涑水則指揮賈榮拔東平則指
揮詹璟拔汶上則指揮薛鵬沱河之戰則胡騎
都指揮林帖木耳淮河之戰則守將丁良朱彬
靈璧之敗則都指揮孫晟王貴都督陳暉馬溥
徐真等一百八十餘人及夫守將陶銘胡觀孫
霖都指揮袁宇房昭葛進劉遂俞瑱何清都督

何福皆力戰有功未嘗被執也未簡姑記名姓
以俟詳訪續書焉

華朝志卷八

傳疑

王璉傳

王璉字器之山東日照人通經史尤長于春秋洪
武初任教授以累謫遠方洪武末以賢能薦授寧
波知府清儉律已平易近民杜私謁革吏弊政教
兼舉璉自奉甚約一日見饌有魚肉怒命瘞之遂
號埋羹太守尤痛繩武人之不瀆者故武臣深銜

浙澣

許相鄉

撰

之建文末北師乘勝日迫璉造船航海為勤王計
軍衛執縛送京師文皇問曰造船何為璉徐對
曰由海趨瓜州截來路耳上義而釋之觀人黃
潤玉四明文獻錄贊曰獨于軍衛痛抑奸貪又云
富貴不淫患難莫恤神明其心終始一德云

劉貞傳

劉貞合肥人洪武中寧敵王封大寧貞以都督搃
兵靖難兵起文皇首入大寧盡握其軍以行遂
入松亭閔貞恐被執夜負勅印浮海而南建文

君聞北平諸將多降因籍貞家悉下之獄明日貞
還自閔詔釋其家靖難後陞左都督鎮遼東愧憤
成疾永樂元年卒貞長女為文皇昭順德妃故
得免於禍云

卜萬傳

卜萬建文中以都督守遼東禦北師萬將陳亨謀
附北師而為萬所劓潛邸知之會軍中獲萬卒二
人乃詐為書遺萬盛稱萬而極詆毀亨緘識牢密
召所獲卒一人飲之酒厚賚之而置書其衣中俾

歸與萬同獲卒竊窺之問守者曰彼何為守者曰
遣歸通萬故得厚賚卒告守者曰儻得偕行請惟
命不敢望賚守者如其言為請遂得俱遣而不得
賚者終不平至即泄其事劉貞陳亨搜卒衣得與
萬書遂執萬下獄籍其家會吳高亦以反間廢乃
專命楊文守遼東文兵無紀律潛邸素知之云

吳高傳

吳高江陰侯良之子為神策衛指揮使署前軍都
督府僉事襲父爵建文己卯十月高以遼東兵十

萬攻圍燕之永平敗走復移鎮大同後以反間見
疑詔削侯爵安置廣西事見卜萬傳

梅殷傳

梅殷河南夏邑人或曰歸德人汝南侯思祖兄子
也尚高皇后長女寧國公主為駙馬都尉恭謹
有謀善騎射高皇尤愛幸諸駙馬莫敢望洪武
未出鎮淮安號令嚴明軍威大振北師起吏部侍
郎茅大芳嘗詩寄勉之及師迫猶固守淮安後
文皇繼統殷諗其母家居無恙散師還京文皇

寵賚甚至殷不能平時見詞色。文皇疑之，每夜遣小宦者潛入殷第，察動靜。殷愈怒。文皇不得已，屬人伺殺殷于筵橋，投屍水中。公主入宮，大慟。乃官其子順昌、景福，皆指揮。孫純，成化辛丑進士。博學性剛，有祖風。

李堅傳

李堅，河南武涉人。洪武中以功臣子，選尚大名公。主為駙馬都尉。建文帝即位，公主進封太常公主。堅以軍功封欒城侯，亡何命取炳文北伐。堅拜

左副將軍，及北師戰于真定，炳文軍備西北不備。東南北師出不意，擊之，炳文幾被執。北將丘福攻子城，堅領兵接戰，互有勝負。已而兵敗，北騎士薛祿引槊刺堅墜馬，揮刀斫之。堅大呼曰：「我李駙馬也，勿殺祿生擒以敵潛邸，謂曰爾至親也。」今至此安所逃罪械送北平，道死。子莊當襲公主，懼禍乃納誥券莊流寓南京，以壽終。崔銑彰德志載堅為郡人，與李讓同時為駙馬都尉，而讓寔附潛邸。要之堅寔河南產云。

甯忠傳

甯忠建文中以都督充右副將軍己卯九月與李
堅同戰真定被執

耿炳文傳

耿炳文直隸濠州人父君用元末從高祖取滁
州積功為明威將軍管軍總管克采石取金陵君
用有功炳文從焉丙申與張士誠戰宜興君用賈
勇先登而死炳文代領其軍明年取廣德長沙擒
士誠守將特立元帥府于長興以炳文為總兵都

元帥敗士誠將李伯升追斬五千餘級拜指揮使
撫綏有方吳元年破蘓州士誠就擒論功召見降
諭曰今日之功雖古名將不能過也陞大都督鎮
國上將軍兼右帥府副使同徐達征陝西克之留
炳文鎮守授秦王府左相兼陝西行省右丞封長
興侯又輔徐達大破虜兵于北黃河復還陝西賜
鎗鈔造第鳳陽葺先塋追爵君用為侯陝西兩當
縣妖人作亂承制搃兵聲討三年克之蜀中盜起
命為征西將軍往剿平之後鎮守遼東建文改元

北師起命炳文佩大將軍印自遼東率衆二十萬
援真定都督徐凱領兵十萬騎駐河間都督潘忠
都指揮楊松營鄭州先鋒至雄縣潛邸帥師禦之
以中秋夜出炳文不虞破雄縣忠松引衆來援伏
兵起忠等皆被擒因得炳文虛寔遂長驅至真定
壬戌北將張玉朱能譚淵來戰炳文大敗幾被擒
奔還滹沱河東炳文衆尚數萬十月復戰衆皆潰
降副將駙馬都尉李堅都督竈忠顧成俱被擒炳
文固守真定北兵攻城兩月不能下而去炳文老

將長於戰至是敗覆 帝始有憂色乃召還以李
景隆代功臣錄謂炳文歿于陣或云歸附後永樂
二年被劾暴卒子三璿前軍都督府僉事尚懿文
長女江都郡主建文中為駙馬都尉璿龍虎將軍後
軍都督府僉事嘗帥遼東軍馬與江陰侯吳高圍
北平有功瑄散騎舍人擢尚寶卿後皆獲罪死

潘忠傳 附楊松

潘忠建文間都督與都指揮楊松同守鄭州己卯
八月北師起克灤河進襲雄縣忠等往救之燕山

護衛千戶張玉告潛邸曰潘忠楊松扼吾南路宜先擒之於是發兵命玉與朱能將又得嚮導劉泰十五日夜襲破其東門衆敗走追及于月樣橋忠松皆不屈死

董倫傳

董倫字安常故山東恩縣人。世居燕之宛平。自處山林間。布褐藜藿。已懷憂世之志。學者多從之。遊以所居貝州。因稱貝川先生。元末徵辟不出。世高其行。國初擢用。單縣儒士張寧以倫薦。徵為春

坊贊善大夫。賜冠帶。事懿文皇太子。陳說多長

厚語。太祖高皇帝聞而善之。由右春坊右贊善

陞左春坊大學士。賜文綺六疋。鈔五十錠。會東宮

晏駕。二十五年出為河南左叅議。盡心民事。名其

退食思政之堂曰後樂。方孝孺為之記。嘗草封事

數千言。無一不當。上心者。又上書薦肇州吏目

諸葛伯衡。太祖遽擢為陝西右叅議。三十年以

註誤免官。典教滇南。東宮憐其老。賜以白金若干

鎰。倫行至成都。蜀敵王深寵之。賦詩八章以道行

至滇凡作養成就用夏變夷漸摩膏煦皆出于仁
義道德故雖蠻童夷豎皆知向方建文帝即位
眷念東宮舊臣屢詢及之左右亦多言倫可用召
至京師慰勞備至拜嘉議大夫禮部右侍郎兼翰
林院學士與方孝孺同入內閣侍經筵御書怡老
堂及髹几玉鳩杖各一賜之初監察御史解縉以
權_臣仇嫉譖之謫河州衛吏縉與倫書祈援歲餘倫
為之言乃召縉還以為翰林待詔其汲引人材類
如此倫為人質直敦厚富文學為時所重建文間

屢懇言當務親睦不聽文皇即位時倫年八十
餘有旨令致仕出京悒悒成疾數日卒

徐宗寔傳

徐宗實名垕以字行浙江黃岩人與弟宗茂俱從
永嘉史伯璿元末教授鄉里洪武中應聽赴闕
高廟稱其通達治休命司風紀職宗寔以草茅愚
孱辭授銅林縣簿謫淮陰驛丞郡邑士多所造就
召見獎諭屢聘主文衡奉旨作饒歌鼓吹著為樂
典奉使兩淮多所建明以嫉惡太過被劾去職尋

起為尚寶司丞建文中任蘓州府通判擢署兵部
右侍郎請移風俗罷不急振舉廢墜裁定賦稅撫
安農業開政教之路塞異端之源進賢退不肖等
十事皆切要務人以徐雍熙目之北師起奉使招
集兩浙義勇又明年文皇即位覆其家卒于京
或云永樂初乞骸骨歸二載臬司鞠囚詞連宗寔
逮至京卒于邸張顯宗傳云歸附之臣有政事者
如大理寺卿虞謙侍郎徐宗寔云

華朝志卷九

名臣列傳

沐春傳

浙浙

許相鄉

撰

沐春字景春直隸鳳陽定遠人黔寧王英長子也
春生未期母歿鞠於外氏長歸就學年十七侍英
征西番明年從征亦集乃又明年從征雲南皆禽
其渠魁功先士卒洪武癸亥春還京師遂掌禁旅
是冬江西寇起煽亂諸郡春時從征奮勇先登殲

之乙丑秋授春驃騎將軍僉後軍都督府事廷臣
請試職高皇帝曰是兒我家人非他比也俾寔
授春嘗錄囚于烈山審逆黨那海于蔚州剖決精
敏開釋誣誤各數百人壬申英薨于雲南春萬里
奔喪起襲西平侯爵摠兵鎮雲南一遵父道修舉
屯政歲較多寡以為賞罰稽功乃倍饋餉以足癸
酉緬甸東川夷酋相繼作難春調都督瞿能授以
成算往皆殄平之甲戌春復平越雋番寇先是越
州蠻河資倡亂西南朝廷費數萬師往、無功春

卒平之麓川宣慰使思倫發為其下所圖戊寅四
月春奉命致討破刀干孟諸砦誅其首惡餘釋復
業自是百夷震懼不復攜貳功聞授征虜前將軍
命盡平其地功未竟春以是年九月薨年三十六
帝聞訃震悼加賻遣官往祭命有司護喪至京復
諭祭者再賜謚惠襄春沉毅果敢明識絕倫在鎮
七年闢田凡三十餘萬畝復人戶五千餘又鑿鐵
池河灌涸田數萬畝民蒙其利春無子弟晟襲西
平侯爵相傳帝之南也晟寔使人護送云

錢芹傳

錢芹字繼忠直隸吳人少負氣節欲以奇功自奮
元季以策干諸將無所遇洪武初辟大都督府掾
從大將軍徐達出北平絕大漠凱旋以例解職家
居二十年甘貧樂道自守甚高郡守姚善以殊禮
賓之語在善傳革朝初詔求遺逸善以芹應詔召
對稱旨留中議事授戶部司務北師起署行軍斷
事從征虜將軍咨謀會軍府遣芹入奏道病卒瀕
卒猶條兵事緩急上執政年七十二賜棺殮歸葬

黃山

王紳傳

王紳字仲縉浙江義烏人父禕以文行重海內與
宋濂齊名 太祖徵署中書省掾議論字契時
稱子充而不名嘗曰浙東二儒鄉與濂耳鄉不如
濂學博濂不如鄉才雄擢儒臺校理歷起居注出
判南康臨漳二郡皆有惠政會修元史禕為總裁
官進翰林院待制洪武壬子禕使雲南偽梁王伏
節死時紳年甫十三聰敏過人落筆成文沛然莫

禦鞠於伯氏綬事母何盡孝母卒哀毀踰禮未幾
綬亦歿紳獨綜理生業煢煢憂患中而傑然負竒
志暇日盡取經史百氏窮其旨歸見之論著縱橫
磅礴出入上下宋濂一見器之曰華川其有後乎
一時英俊咸歎服不逮華川禕別號也洪武二十
五年蜀獻王聞其賢馳書幣聘致待以客禮俾教
授蜀郡紳痛父遺骸未返立壠白王走雲南王為
給道里費至雲南野哭行求不獲即死所奠祭一
慟幾絕行者為之泣下遂述滇南慟哭記以見志

雲南布政使張純特重之作平王翰林文紓其情
時用給事中徐誠御史黃凱薦召紳為國子博士
入詞垣編摩高皇帝寔錄與方孝孺同事尊孝
孺為百代儒宗勸之著書以淑來世孝孺不答紳
亦悟自是益嚮道德略文藝嘗以父禕死節事聞
于朝得旨贈翰林院學士謚文節國朝文臣有謚
自禕始華朝庚辰紳卒年四十一有繼志齋集三
十卷藏于家子徐別傳

高遜一作志字士敏直隸蕭縣人元末僑寓嘉興
好學嗜文辭少嘗侍父宦遊吳中一時文章家如
宣城貢師泰鄱陽周伯琦遂昌鄭之佑俱客遊吳
遜志皆獲受業故其為文深醇雅則成一家言年
二十五為鄞山書院山長洪武二年徵修元史入
翰林為編修累遷侍講學士革朝庚辰會試禮部
尚書陳迪侍中黃觀知貢舉遜志以太常寺右少
卿與董倫為考試官得吉水王良常熟黃鉞莆田
陳繼之廬陵胡廣崇仁吳溥建安楊子榮新淦金

幼孜石首楊溥武進胡濙太康顧佐時稱得人同
較藝者右拾遺朱遜吉編脩史官吳勤葉惠仲趙
友士徐旭一作張秉彝監試御史王度俞士吉亦
一時之選壬午之變王度葉惠仲死難餘順命顯
庸遜志存歿無可攷見殆晦迹終身挺節不汙於
時耶

唐愚士傳

唐愚士名之淳以字行浙江山陰人有異質負奇
志父肅仕國初應奉翰林文字愚士侍肅歷遊名

士大夫間宋濂亟許其才勉之學年二十已有聲於時肅謫死臨濠愚士辛勤扶喪歸葬求父遺文荒郵敗壁高崖斷石靡不窮探脩錄時時伏讀淒切聞者掩泣愚士善筆札為文贍蔚有俊氣尤長於詩洪武中當道屢薦謝不就曹國公李景隆好士為勲戚第一聞愚士名聘為子師征行四方皆與之俱歷燕薊秦周覽前代遺跡援筆而賦詞旨超絕躡蹠一時性善飲酒飲酣高談傾座時間諧謔日夜不窮建文辛巳詔詞臣集經史中數千載

事為一書以考治亂昭鑑戒命舉優通文學之士共事編纂方孝孺以愚士薦帝亦雅知其名趣召至賜冠帶拜翰林侍讀與孝孺同領修書事日以前漢書進讀未幾病卒年五十二所著有萍居稿文斷諸書

宋懌傳

宋懌字子夷浙江金華人濂之孫中書舍人璩之子也濂以孫慎累舉室徙夔州璩亦死家難璩書甚工當時稱為國朝義獻懌奉母謫居思紹父書

勤苦特甚蜀敵王憫之時賜粟帛由是得專其學
建文君念濂為皇考舊學之臣召懌還以為翰
林侍書懌書與劉彥銘朱思平名朝間而濂
門人有聲者同郡樓璉浦江鄭楷云

華朝志卷十

外傳

李景隆傳

浙滸

許相卿

撰

李景隆直隸盱眙人父文忠曹國長公主之子追
謚岐陽武靖王景隆襲封曹國公高祖嘗書體
爾祖禰忠孝不息八字賜之使讀書友儒生一時
若林右唐之淳諸名士景隆皆與之游建文初與
魏國公徐輝祖等俱以元勳任用北師起命景隆

為征虜大將軍帥師北伐賜通天犀帶餞之江潁
景隆乘傳至德州收集耿炳文敗亡將卒調各處
軍馬五十萬進營河間潛邸聞之語諸將曰李九
江養之子驕矜寡謀忌刻自用况未嘗習兵見
戰陣而輒以大衆付之漢高祖不過能將十萬九
江何等才能將五十萬趙括之敗可待矣復召
謀者問軍中景隆事笑曰兵法有五敗九江皆蹈
之紀律不整上下異心一也北地早寒南卒裘褐
不足披冒霜雪皸瘃墮指士無贏糧馬無宿藁二

也不量險易深入趨利三也貪而不治氣盈而愎
威令不行三軍易撓四也好諛喜佞專任小人五
也五敗悉脩保無能為今吾在此必不敢來往救
永平彼知我出必來攻城回師擊之堅城在前大
軍在後必成擒矣諸將曰永平兵潛邸曰城中之
戰衆則不足守則有餘世子能推誠任人足辦禦
敵若全軍在城祇自示弱彼得專攻非策之善內
外犄角竒變互用破敵必矣吾出非專為永平直
欲誘九江來就擒耳吳高怯不能戰聞我來必走

是我一舉永平而破九江也九江景隆小字云十
一月景隆引數十萬圍北平城再戰鄭村壩大敗
匿不以聞明年二月景隆致書請即歸多遜諸將
皆怒四月丙申景隆引兵號百萬軍德州郭英吳
傑等軍真定漸移近北先是朝命中官賚壘書賜
景隆斧鉞專征渡江忽沈于水識者以為不祥至
是復賜之已而遇北師戰于白溝河三進三卻兵
皆漫散南奔德州諸處俱陷惟山東叅政鐵鉉固
守濟南而緣江州郡皆望風降附揚州高郵等衛

皆相率納款景隆不以為意未幾鎮江亦北附矣
初景隆奔還練子寧等請誅之帝不聽北師渡

江駐金川門帝猶使城守景隆與潭王開門迎

納帝閣宮自焚六月十三日也文皇既即位

論功行賞封景隆奉天護運推誠宣力武臣特進
光祿大夫柱國太子太師曹國公增祿一千石通
前四千石子孫世世承襲銀四百兩綵緞四十表
裏鈿四千貫尋命克脩太祖皇帝寔錄都總裁
官景隆與解縉等以意刪改其後谷王穗以謀逆

廢為庶人景隆緣是獲罪革爵明年周王以景隆受賄聞遂執下獄景隆曰非臣陛下何以有今日文皇曰幸是朕來若他人來爾亦開門耶景隆詰塞闔門禁死

陳瑄傳

陳瑄字彥張直隸合肥人建文朝官都督北師薄浦口諸軍戰不利命瑄率水軍往援瑄迎降北軍遂濟師進圍京城文皇即位封瑄平江伯歷仕熙宣間有功漕河卒年六十九追封平江侯謚恭

定

陳瑛傳

陳瑛人歷仕洪武至革朝中為北平按察使坐交通潛邸受賞賚有異謀削秩廣西安置文皇即位首召瑛為都察院右副都御史瑛怨建文帝及諸臣最深詔為帝輟朝五日瑛請減之上不從瑛又抗奏黃觀廖昇王叔英周是脩王良顏伯瑋等皆不順天命效死故主心同悖逆宜追戮之上曰朕初舉義兵誅奸臣不過齊黃

數輩後來二十九人中如張純王純鄭賜尹昌隆
黃福皆宥而用之今汝所言數人况有不與二十
九人之數者彼食其祿自盡其心耳置勿問蓋北
師初入京城昇及是修自縊死觀募兵安慶投江
死叔英守廣德自縊死良在官閣門自焚死北兵
至沛縣顏伯瑋不肯下與其子俱死後瑛閱方孝
孺等獄詞遂簿錄觀叔英家妻女皆給配觀妻出
通濟門先擠其二女於河遂自沈叔英二女就錦
衣獄俱赴井死其違命忍心後竟以羅織苛刻得
罪誅至洪熙時死義諸臣族姍謫戍者皆釋還田
里天順中又釋建庶人之囚弘治間有請繼絕褒
忠者於是瑛罪益不可掩矣

茹瑺傳

茹瑺湖廣衡山人身長八尺面骨深峻相者謂封
侯而不終洪武中貢入太學累官至左通政甚稱
上意舊令中外文武服勤在官者復其家 上以
瑺卓異并其田塘園林一切租稅悉蠲之其伯叔
兄弟詣闕謝及陞辭 上賜鈔鏹仍勅光祿寺酒

穀偕瑞往餞之累遷兵部尚書太子少保華朝中
以尚書掌河南布政司事北師起瑞主兵餉及兵
迫京師遣曹國公李景隆都督王佐及瑞往龍潭
見潛邸瑞望風紉歎未幾師入都城羣臣未有言
瑞獨先稽首勸進 文皇繼統瑞以奉天征討功
封奉天翊運守正文臣特進榮祿大夫柱國太子
少保兼兵部尚書忠誠伯食祿一千石子孫不世
襲券文有內外一人中流砥柱之褒詔以秦王第
二女長安郡主下嫁其子鑑禮遇優渥賜賚不可

勝算後乞致仕尋以事逮至京師死於獄宣德初
徵瑞幼子鏞官之鏞不敢受

胡廣傳

胡廣字光大江西吉水人生八歲而孤自幼好學
日記數千言舉華朝庚辰進士第一賜名靖授翰
林修撰擢侍讀壬午六月北師入都城靖與解縉
王良吳溥數人寓舍連楹皆踰垣集溥舍縉陳說
大義靖憤激慷慨良獨流涕不言溥曰三子受知
日深事在頃刻若溥去就固可從容也時溥子與

弼尚幼侍側三人去與弼歎曰好胡叔能伏節溥
曰不然王叔死耳語未竟隔牆聞呼曰外間甚看
猪溥顧與弼曰一猪不忍寧自忍乎湏臾良舍哭
聲震動矣縉馳謁潛邸一見喜甚縉莫歸靖復見
曰情與君殊行當自決縉曰吾與汝不死縉復入
見曰臣才不及靖堪大用也曰盍與俱來對曰湏
遣近臣諭以大義乃可遂如縉言靖至潛邸迎執
其手曰好個秀才如何從我媿兒靖叩頭 文皇
即位靖復名廣拜翰林學士左春坊大學士信遇

特隆一時制誥戒諭之文多出其手詔脩五經四
書性理大全命廣總裁嘗從巡北虜出居庸關入
沙漠王師所至功烈炳耀多廣紀述永樂十一年
春駕幸北京廣再扈從出塞滅虜還內艱服闋進
文淵閣大學士兼春坊嘗上却封禪頌歷數前代
帝王不務國事矯誣上天卒貽天下後世笑時稱
其有識廣自稱澹菴之後喜談忠義事嘗集文山
事蹟為傳記序之以傳卒年四十九累贈少師謚
文穆與廣同時者解縉楊士奇夏原吉楊溥楊榮

黃淮金幼孜蹇義輩皆攀龍附鳳為時大臣云後
大學士李東陽讀廣所述文山傳記跋以詩云狀
元忠義古今傳野史何如舊史全刪述摠煩胡學
士姓名猶記丙申年意最微婉百年後公論乃定
大都若此

楊士奇傳

楊士奇名寓以字行江西太和人早孤母改適羅
氏士奇感奮力學郡縣交辟不就舉明經授教官
未赴王叔英知其才薦于朝建文初修高廟寔

錄遂入翰林與編纂考授齊府審理副陞翰林侍
講文皇御極士奇歸命復官歷事熙宣正統間
與楊榮楊溥共持政柄號三楊而士奇文名特盛
位至少師卒年八十贈太師謚文貞其自志曰起
家文學除授審副又云叨祿于朝歷事四聖已自
遺建文帝矣

楊榮傳

楊榮字勉仁初名子榮福建安人為諸生時夏
原吉以採訪使巡行八閩一見榮以公輔期之是

年秋發解閩省建文庚辰進士潛邸師入城城榮
迎謁馬首曰殿下先入宮乎先謁陵乎由是知遇
歷事熙宣正統間位至少師卒年七十贈太師謚
文敏

楊溥傳

楊溥字宏濟湖廣石首人建文庚辰進士 文皇
繼統歸附復官歷仕熙宣正統間位至少保卒年
七十五贈太師謚文定與楊士奇楊榮歸命後柄
用最久而專寵任相埒溥獨後亡世稱三楊學士

士奇為西楊楊榮為東楊以潛邸別之溥邸望書
南邸因稱為南楊云

解縉傳

解縉江西吉水人舉洪武戊辰進士擢中書庶吉
士累上封事指斥時政詞甚剴切 太祖多見采
納兵部尚書沈縉疾其年少欲苦之譖改御史在
臺以敢言稱縉嘗代夏長文作劾袁泰書泰銜之
因肆誣訐 太祖命其父將縉還鄉著述十年許
以擢用及期而 太祖崩縉遂奔喪京師時縉母

喪未葬父年九十矣有司以非詔旨謫河州衛吏
歲餘朝廷憐其才召還以為翰林待詔建文帝
大信任之北師入都縉首先迎附文皇既即位
簡用七翰林縉與胡廣楊士奇金幼孜黃淮胡儼
楊榮時與密議尋陞縉侍讀進侍讀學士時議建
儲武臣立福請立皇次子高煦甚力遂召縉議
議定秘之逾年冊獻陵東宮縉進春坊大學士
高煦怨縉切齒日誣譖之乃出縉為廣西右叅議
李至剛又言縉怨望改交趾高煦又誣譖之徵下

獄三年病死獄中籍家徙邊洪熙初赦還官其子
貞中書舍人

蹇義傳

蹇義字直之四川巴縣人洪武間進士建文初官
至侍郎歸附文皇復官歷仕熙宣間位至少師
卒年七十三贈太師謚忠定

夏原吉傳

夏原吉字維詰湖廣湘陰人洪武間鄉貢士建文
初官至侍郎文皇繼統歸命復官歷事熙宣間

位至少保卒年六十五贈太師謚忠靖

黃福傳

黃福字如錫山東昌邑人由太學生授項城縣主簿遷金吾前衛知事陞龍江衛經歷上書論大計洪武中超遷工部右侍郎用事建文間後北師入都歸附 文皇即位遷工部左侍郎尋陞尚書北京初建改北京刑部尚書交趾平置三司命福兼署藩臬在交二十年洪熙中召還會交人叛鎮守尚書奏請還福于交命福同將臣帥師往及戰失

利交人擒福不忍加害送之出境召為戶部尚書數日轉南京戶部正統初加以保仍兼尚書守備南京五年正月死成化初贈太保謚忠宣初齊黃之獄李景隆并指福為奸黨福厲聲曰臣罪應死但目為奸則非朝廷置不問

王景彰傳

王景彰浙江松陽人以字行洪武初為懷遠教諭以文學知名擢江西右叅政坐事謫雲南建文初召還為翰林侍讀纂修 太祖寔錄為總裁官北

師入都歸附 文皇即位陞學士

尹昌隆傳

尹昌隆字彥謙江西太和人入鄉校擅文名應貢中應天鄉試第一洪武丁丑禮闈第二賜進士及第授翰林院鄉脩改監察御史建文初視朝頗晏昌隆上疏切諫 帝嘉納示中外時大臣相訐奏者命各道鞠之同官皆畏縮昌隆獨不避一繩以法巡撫福建去貪苛理冤獄所至風裁凜然還朝上疏言當節民力謹嗜欲勤政治務正學不報既

而京師地震又上疏言陰盛陽微奸臣專政所致執政者憾怒黜知福寧縣以清白公勤稱坐中使誣其呪詛下獄既白還京預密議北師南逼昌隆上書言今事勢日去而北來章奏有周公輔成王語不若罷兵息戰許其入朝設有蹉跌舉位讓之猶不失作藩王也若優游不斷禍至無日雖欲求為丹徒布衣寧可得乎不報 文皇繼統命捕齊黃方等奸黨驅出戮之昌隆亦與焉當陞大呼曰臣曾上章勸以位讓陛下奏牘可覆按也乃命緩

刑閱其奏果爾乃貸昌隆死用為北平按察司知
事時皇儲未立武臣立福言皇第二子高煦
有扈從功文皇猶豫以問昌隆昌隆叩頭曰長
嫡承統萬世常經遂冊仁宗為皇太子高煦為
漢王進昌隆春坊中允前後在東宮隨事匡諫多
所裨益漢王忿昌隆切齒譖上黜為禮部主事
尚書呂震永承寵用事屬官諂附容取昌隆獨以
剛正自處震深惡之劾奏昌隆狠愎專行無屬官
禮且昌隆身事庶人名在黨籍苟免忘義其心亵
測命下之獄籍其家谷庶人謀逆事覺坐與謀昌
隆力辨震卒傾之論死震病革時呼號乞命曰
尹相尹相妻子問故曰昌隆守欲殺我震竟死

張顯宗傳

張顯宗字明遠福建寧化人少喪父母黃守志教
之舉洪武辛未進士第二人授翰林院編脩陞太
常寺丞建文中自國子監祭酒陞工部右侍郎靖
難師渡淮顯宗奉詔往江西起義旅勤王募民出
粟給饑文皇即位顯宗及江西布政使楊璉按

察使房安僉事呂升並為軍校執送京師釋不誅
謫戍興州後起顯宗為交趾布政使顯宗有文學
多著述惜其功名不終一時扳附之臣政事如大
理卿虞謙侍郎徐宗寔文學如侍讀王景彰司業
張智脩撰李貫輩雖皆歸附登庸上寔不之重
云

王鈍傳

王鈍字士魯河南太康人洪武間由吏部郎為福
建布政司參議寬慎廉介民懷其惠章朝中遷戶

部尚書北師至鈍出走已而歸附文皇登極召
見之曰爾向輔建文間朕骨月今何顏見朕耶鈍
頓首慚謝降布政使致仕遂快成疾死

李友直傳

李友直字居正直隸清苑人始為北平布政司吏
張曷屬以機事陰洩於潛邸語在曷傳北師興擢
友直北平布政司右參議出理饑運入嚴城守凡
事皆集北京初建擢友直刑部侍郎受命經度官
室提督勤勞仁宗即位嘉念舊勞陞友直工部

尚書命代祀周文武成康陵及秦愍王墓既還言
關中民瘼深見嘉納賜誥命贈三代歷仕熙宣間
凡興作重役悉以委之與黃福楊士奇相莫逆死
年七十七士奇撰神道碑銘稱其坦夷闔敏有長者
風云

李貫傳

李貫江西廬陵人華朝庚辰進士第三人為翰林
院修撰北師入都貫歸附復官 文皇一日持建
文時羣臣封事千餘通命翰林院侍講解縉等徧

閱之凡關係錢糧軍馬者留覈語涉干犯者悉焚
之既而從容問縉等曰爾等宜亦有衆稽首未對
貫獨曰臣寔無之 上曰爾以獨無為美耶食其
祿思任其事當國家危急之際在近侍獨無一言
可乎朕非惡盡心于建文者但惡導誘建文壞法
亂政之臣耳爾等前日事彼則忠于彼今日事朕
當忠于朕不必曲為遮蔽也貫後陞中允以姻家
累坐罪下獄死

羅義傳

羅義山西清遠衛戍卒也草朝加兵潛邸義詣闕
上書乞息兵講和又上潛邸書畧曰昔者武王崩
成王幼周公叔父也而輔相焉管叔流言以間王
室周公誅之殿下聰明英武博通經史今之周公
也宜以周公之心為心謹守燕土則天下皆以為
周公之聖復生于今日矣又謂古之夷齊以國相
讓去隱于首陽山矧聖賢欲成天下之事必光明
逆順之理成敗之勢禍福之機又得天道之宜人
心之安然後可殿下以敵國敵朝廷如遂其願臣

寔羞之書上忤旨下獄 文皇即位義歸附以為
戶科給事中陞湖廣布政司左叅議代左叅議楊
砥入為鴻臚寺卿建文時砥嘗上書請敦親睦罷
兵息民云

薛嵩傳

薛嵩陝西閩鄉人慷慨負志操有治才有口辨洪
武間累官大理少卿草朝特見信任辛巳北兵日
南王師屢敗方孝孺草詔令嵩賫至燕軍又作宣
諭數千紙付嵩密散軍士使歸朝廷嵩至師說曰

上言殿下旦釋甲謁孝陵暮即下令旋師潛邸叱其紹已崑不能對左右欲殺之潛邸曰此天子使也釋之謀遂不行京師定免崑死謫廣西永樂初安南國王為黎季犛所殺其孫陳天平自老撾來歸季犛子蒼澄請還上命廣西總兵官都督黃中以兵五千送歸國舉崑為輔行至芹站伏發劫天平崑被虜死

劉有年傳

劉有年字大有其先江西廬陵人元季徙楚沅州

洪武中以明經擢監察御史學行焯有稱以辭官養母忤旨謫徙通州嘗得儀禮逸經十八篇上之詔藏秘閣建文帝即位起知太平府邂逅王紳以道義相勗北師入都以不肯迎駕謫滇南黔國公知其賢遣諸子從之學且薦于朝交趾平復起為安南按察司僉事其卒也黃福誅之曰江湖胃次洙泗規模文宗韓柳學本程朱其為時所推如此惜少一死耳

徐安傳

徐安浙江鄞縣人洪武中舉人材累官知山東濟南府後調鳳陽建文壬午北師日急潛邸自揚州趨南京微服間道從靈壁出鳳陽安謀知之拆浮橋絕舟楫以守潛邸獲一漁舟濟即位後罷安放歸田里年餘舉遺逸有司以安應詔復任數載諸戚里奏安庇細民奪莊業文皇始怒曰朕昔猶為所困况若曹乎逮至謫戍雲南

平安傳

附孫狗皮

平安一名保兒直隸藁城人驍勇善戰有名建文

庚辰四月以都指揮從李景隆與北師戰白溝河辛巳閏三月戰藁城統卒十餘萬大敗北兵於小河壬午春克副總兵督遼東軍十萬圍通州大戰單家橋四月退至靈壁大戰為北將朱能所擒安嘗操長鎗馳馬追潛邸幾及會馬蹶弗前至是問之曰向非馬蹶汝將何為安大言曰欲刺殿下耳上壯其言歎曰高皇帝養下好男子慰勞備至命掌北平都指揮使司事文皇即位久之間平安保兒尚在耶安遂自經死少保李賢稱鐵鉞之死

之烈曰平氏有媿馬又有北平指揮孫狗皮徐州人建文間有戰功以忠義聞永樂初降百戶

吳亮傳

吳亮者建文朝中官最親幸初帝焚宮逸去時疑匿僧溥洽所乃加洽他罪禁錮之復命給事中胡濙以訪張邈邈為名徧歷海內物色之絕不可得正統初有老僧至田州土官司自稱建文由閩歷滇遊方至此今老矣欲送骸骨歸帝鄉官司震愕驛赴京咸稱老佛既至寓大興隆寺內豎迭視

之莫有識者老佛乃曰吳亮在不更遣亮往見亦遲疑老佛曰不見四十餘年猝亦難辨吾語汝一事我昔年御便殿汝時侍膳吾賜汝醬肉汝左右手各有持吾投之地汝飽食之汝寧忘之耶亮失聲哭復命曰信是也遂命迎老佛入西內佛堂供養後莫究其終學士尹直得其詳於老內臣云

革朝諸臣復官新朝後至顯盛者叙列為外傳有不盡載者尚書鄭沂郁新侍郎古朴劉季麓盧淵都御史劉觀向寶編脩吳溥葉砥給事中

徐思勉御史俞士吉文選郎中陳臨國子助教
鄒緝知縣梁潛中間亦有負重望稱名臣者彼
李友直特閭閻匹夫刀筆賤役從齊豹書盜例
宜矣不祥姓名奚足汗簡牘為哉而亦列諸外傳
何耶蓋以見于時鄉大夫改而居易辭生安與友
直同朝歿當與友直同傳小黠大貪其歸一揆
是亦一李友直焉爾後雖高才震世偉烈格天
終千古不足掩斯耻云



